

TAKU MANU TĀWHIOWHIO

NĀ JASON KING (WAIKATO, NGĀTI MAHUTA)
NĀ VALANCE SMITH (WAIKATO, NGĀTI MAHUTA, NGĀPUHI)

I te marama o Hakihea, i te tau 2010, i toko ake te huatau kia titoa tētehi waiata mō Tā Pāora Reeves. Nā tōna kaha ki te mahi i te ao Māori, i te ao Pākehā, ā, i te ao Atua anō hoki. E mohiotia whānuitia ana e te tī, e te tā, ehake a Tā Pāora Reeves i te tangata, he ata kē ia nō te Atua. Ko ia rā hoki te Manukura o te Wānanga Aronui o Tāmaki Makau Rau.

Nō reira, he waiata tautoko tēneki waiata. He waiata whakareka hoki i ngana kupu, i ngana kōrero waiwaiā. He waiata e tiutiu atu ana ki ngā manu o te kī, kia whakapiripiri mai ki te rākau taumatua, ki reira kōrerorero ai ngā take o te wā. He pātere e takitaki haere ana i ngā tohu whenua, tohu maunga, tohu awa, tohu moana anō hoki. Kei roto tonu i ngā ingoa o ngā wāhi he kōrero hītori tāngata, he kōrero hītori whenua mō Tāmaki Makau Rau.

He mihi tēneki ki a Valance Smith, nāna te taki o te waiata pātere nei me ngētehi o ngā kupu i tākoha mai. He mihi hoki ki a Ngarimu Blair (Ngāti Whātua), mō ngētehi o ngā whakamārama o ngā ingoa o te wāhi nei. Ko te mihi whakamutunga ki a Tā Pāora Reeves i kapohia ake ia e te ringa o Hine-nui-te-pō i te 14 ō Here-turi-kōkā, i te tau 2011. I tana matenga, i ūwhia a Aotearoa e te hukapapa o Taranaki, he tohu aroha, he tohu whakapono, he tohu rangatira.

Nō reira, e moe e koro, e oki. Kei taku manu tāwhiowhio tiu kore, auē, taukiri ē!

- Kōrihi atu taku manu tāwhiowhio
Ki te tini, ki te mano o Hākuturi
Aku manu honenga
Aku manu whitirua
- 5 Ki te kai
Ki te inu i ngā Wai o Horotiu
Whakataui iho rā
Ki te roro o te whare
Nanao atu ai
- 10 Ki ngā here Pūrengi
Rangitāmiro ai te kōwhao o te ngira
Ka takakawehia te ara poutama
Pupū ake ake ngā wai o Waitematā
E tū atu ai Te Ipu a Mataaoho
- 15 Tū mai Rangipuke
Ka karanga ā-Hape
Whakawhiti atu ki te Rerenga Oraiti
Te Whatu tauranga kāwau tikitiki
Pou herenga waka
- 20 *Ko te reo pōwhiri!*
Ko te reo karanga!
Ko te mātāpuna o te kete Aronui!
TAU, TAU, TAU ANA E!

Rārangi:

1. **Manu tāwhiohio.** Ko ia rā tētehi manu āmiorangi. He manu e mātai whakamua ana kia kitea ai ngā āhuatanga, ngā rarunga o te wā. He manu kaiārahi i Te Wānanga Aronui o Tāmaki Makau Rau, The Auckland University of Technology (AUT University).
2. **Tini o Hākuturi.** He kaitiaki o te ngahere, kua whakaritea ko te manukura anō tētehi o ngā kaitiaki.
3. **Manu honenga.** He rangatira.
4. **Manu whitirua.** He rangatira.
6. **Ngā Wai o Horotiu.** Te ingoa o te marae o Te Wānanga Aronui o Tāmaki Makau Rau. He waiariki o mua i pupū ake ai i te taketake o Te Pae o Karangahape e tere atu nei ki tōna pūaha, ki a Te Rou Kai tae atu ki te Waitematā.
10. **Pūrengi.** Te ingoa o te wharenuī. He ingoa anō mō ngā taura o te waka e hono tahi ana i ngā ama, i te rā, i te pou hoki kei pakarū, kei wāwāhi. Mā te pūrengi nei hei herehere i ngā tāngata i raro i te whakaaro kotahi, arā, i raro i te rangimārie.
11. **Rangitāmiro ai te kōwhao o te ngira.** Koirā hoki tā Kīngi Pōtatau Te Wherowhero kōrero mō te tuitui haere i ngā miro, i ngā hāhi, i ngā tāngata i raro i te kaupapa kotahi, arā, ko te Atuatanga tērā. I noho hoki a Kīngi Pōtatau ki Tāmaki nei, ki ngā wāhi ki Pukekaroro, ki Pukekawa (kei te takiwā o Tāmaki Paenga Hira). Ko ia hoki tētehi o ngā pou e tū mārō ana ki te roro o te wharenuī, o Te Pūrengi. Ko te wharenuī te kōwhao o te ngira e kuhuna ai te iti me te rahi. Kua kitea hoki ko Tā Pāora tētehi o ngā kōwhao, tētehi o ngā pononga a te Atua.
12. **Ka takakawehia te ara poutama.** Ko te pēpeha tēneki o te Wāhanga Māori ki Te Wānanga Aronui o Tāmaki Makau Rau, arā, o Te Ara Poutama.
14. **Te Ipu a Mataaoho.** He maha ngā kōrero mō te tipua nei, mō Mataaoho. Ki ngētehi nō Hawaiki, ki ngētehi atu ko ia tētehi o ngā tama a Rangi me Papa. Heoti anō, ki Tāmaki nei, ko Mataaoho te kaitiaki o ngā ahi tipua. E ai ki ngā kōrero mō Mataaoho, i kawea mai e ia he ahi nō Hawaiki hei whakakā i ngā maunga. Ki tā Ngāti Whātua kōrero, ko te Ipu a Mataaoho, he ingoa anō mō Te Kapua Kai a Mataaoho, ā, mō Maungawhau hoki.
15. **Rangipuke.** Ko te ingoa Māori o *Albert Park*, Tāmaki Makau Rau. E toru ngā wāhi pā e noho ana ki Rangipuke, ko Horotiu ngōna ingoa katoa.
17. **Rerenga Oraiti.** I te tau 1680 i noho a Ngāti Huarere ki te wāhi nei, arā, ki ngā kūrae o ngā pae maunga. I puta mai te ope tauā o Ngāti Whātua mai i Te Kaipara, ā, ka whawhai ngā iwi. Ko te ingoa o tēneki kakaritanga ko Te Raupatu Tīhore. Ki tā Ngāti Whātua kōrero, i karangahia a Kāwharu. Nāna tēneki kakari i hautū. I kīia ai, ko Kāwharu tētehi o ngā tino toa patu-tangata, ā, nō te waka o *Tainui* ia, nō Kāwhia. Ka mutu ka toa a Ngāti Whātua, ko ngā mea o Ngāti Huarere i ora, ka panaia i te pari o ngā pae maunga nei. Ka riro i a Kāwharu te whakawā ko wai ka ora, ko wai ka mate. Ko ngētehi i hinga whakararo, ko ngētehi i peke whakararo i runga anō i te whakaaro, me i hopukina rātou ka noho hei taurekareka mā Ngāti Whātua. Koirā te take i ‘iti’ ai te rerenga me te orange o Ngāti Huarere. Hoki mai ai ki te tau 1840, i te 18 o Mahuru, ko tēneki te wā i whānau mai ai te Tāone o Ākarana. Ko Te Rerenga Oraiti te wāhi i rere tuatahi ai te pou haki o Aotearoa, nā wai rā, ka panoni te ingoa o Te Rerenga Oraiti. Ka tapaina ko *Britomart Point*. He ingoa whakamana i a *HMS Britomart*. Nā te kaupuke nei te whenua o Tāmaki i tiro whānui, i rūri.
18. **Te Whatu tauranga kāwau tikitiki.** Kei te taketake o ngā pae maunga o Rerenga Oraiti he kōwhatu, ko ‘Te Whatu’ te ingoa. Koirā tētehi o ngā wāhi rongonui ka herehere ai ngā waka ka ū ki uta. He tauranga waka te toka nei ki ngā ākau o Tāmaki Makau Rau. Ko te ‘kāwau tikitiki’ he kupu whakarite mō te rangatira. Nā te rongonui

ka tau mai ai ngā manu o te wao, o te tai, o te wai. Koia hoki ko te pānga ki te manukura o te whare wānanga, ko ia kē te kaikōrihi, anō nei he huia whakahuihui.

19. **Pou herenga waka.** Tāmaki herehere ngā waka.

22. ***Ko te mātāpuna o te kete Aronui!*** I whiria tēneki rerenga hei ingoa mō te whare wānanga nei. He rerenga e kapo ake ana i te ia, i te ngako o te kaupapa o te whare wānanga. He kete pupuru mātauranga te kete aronui.